



Sesida dals

Communitgà ils

Protocol nr.

20 d'avust 2019

21 d'avust 2019

602

Dumonda Widmer (Favugn)

concernent l'adattaziun da la basa legala e finanziaria en dumondas da l'agid social

Resposta da la regenza

Tar la dumonda 1: L'onn 2017 han 2697 Grischunas e Grischuns retratg agid social. Quai èn 1,4 pertschient da la populaziun chantunala. Tgi che dumonda agid social è obligà da cooperar tar l'examinaziun dals fatgs e sto gidar tenor sias forzas a reducir ed ad eliminar la situaziun da miseria (art. 4 da la lescha davart il sustegn da persunas basegnusas [lescha chantunala da sustegn; DG 546.250] e directives da la COSAS A.5.2). Singulas persunas n'adempleschan betg lur obligaziuns e mussan pitschnas stentas d'integraziun. Quai chaschuna lavur e custs supplementars per il maun public. L'experiencescha mussa dentant che las bleras persunas che retiran agid social lavuran gia u vulan lavurar.

Tar la dumonda 2: Mesiras per survegnir infurmaziuns cun l'intent d'exequir en moda correcta ina midada d'abitaziun en cas d'ina persuna che retira agid social, èn l'obligaziun da cooperaziun (art. 4 da la lescha chantunala da sustegn) e la dumonda per agid uffizial.

Tgi che dumonda agid social è obligà da dar tut las infurmaziuns utilas e da metter a disposiziun ils documents ch'èn necessariis per conceder il sustegn economic. Plinavant èsi pussaivel da far ina dumonda per agid uffizial a l'anteriura vischnanca da domicil cun l'intent da survegnir las infurmaziuns necessarias (art. 13 da la lescha davart la giurisdicziun administrativa [LGA; DG 370.100]). Quai sut la premissa ch'i na vegnian periclitads nagins interess publics impurtants e privats degns da vegnir protegids.

En il chantun èn cumpetentas las vischnancas per conceder agid social economic. Las prestaziuns d'agid social, eventualas cundiziuns u er reducziuns vegnan disponidas da la vischnanca da domicil envers la persuna petenta. Quai vegn fatg applitgond ils princips generalis da procedura. La disposiziun d'ina vischnanca n'è perquai betg valaivla ordaifer il territori communal. En cas d'ina midada da domicil ston eventualas cundiziuns u er reducziuns vegnir disponidas danovamain tras la nova vischnanca da domicil. La nova vischnanca da domicil po integrar en sia disposiziun ina

reducziun da prestaziuns d'agid social ch'era vegnida disponida da l'anteriura vischnanca da domicil, sche la persuna pertutgada ha agì cumprovadain en moda giuridicain abusiva. L'abus da dretg sto esser evident. Suspects ed indizis na bastan betg.

Tar la dumonda 3: Il basegn d'infurmaziun e d'integraziun da personas novarrivadas è renconuschidain grond, uschia che la promoziun da l'integraziun e l'intermediaziun d'emprimas infurmaziuns è da gronda impurtanza per il chantun. Sin la plattform d'internet www.hallo.gr.ch vegnan messas a disposiziun – en actualmain du-desch linguas – infurmaziuns per s'orientar en la vita da mintgadi en Svizra. Plinavant maina il post specialisà per l'integraziun in center d'infurmaziun sco post da consultaziun nunbirocratic. Ils servetschs socials regional èn ulteriurs posts da consultaziun impurtants per personas novarrivadas, cunzunt per fugitivas e fugitivs. En consequenza dal grond dumber da fugitivas novas e fugitivs novs ils onns 2014 fin 2018 ha la regenza permess moderadamain dapli resursas da plazzas da lavur per lur cussegliaziun. Uschia ha pudì vegnir garantida ina cussegliaziun adequata. Plinavant ha il chantun fatg ina incarica da prestaziun cun la Crusch cotschna dal Grischun per il project voluntar "eins zu eins". En il rom da quest project sustegnan ed accompognan personas voluntaras las personas novarrivadas en dumondas specificas dal mintgadi, sco l'acquisiziun da la lingua, l'integraziun en il mintgadi, l'integraziun sociala e l'accompagnament d'emprender.

Il fatg che la quota d'activitad da gudogn en il sector d'asil e da fugitivs è auta en cumparegliaziun cun l'entira Svizra, mussa che las mesiras d'integraziun d'enfin ussa fan effect. La regenza è da l'avis ch'in accompagnament adequat da personas novarrivadas è garantì tras la purschida existenta.

Tar la dumonda 4: Ils custs per la cussegliaziun sociala vegnan surpigliads dapi l'onn 2016 da las vischnancas. Perquai ha la regenza tegnì ils ultims onns il dumber da plazzas novas tar il chantun sapientivamain sin in nivel moderà. Sche las vischnancas pretendan in accompagnament pli intensiv da fugitivas e fugitivs, pon vegnir augmentadas las resursas da plazzas da lavur tar ils servetschs socials. Sin fundament da la cumpetenza stuess quest accompagnament pli intensiv en il mintgadi vegnir finanzià da las vischnancas.



En num da la Regenza

Il president:

Dr. Jon Domenic Parolini

Il chancelier:

Daniel Spadin